

10/08/2003

PM sertai jamuan perdana

Daud Awang

MELAKA: Perdana Menteri, Datuk Seri Dr Mahathir Mohamad dan isteri, Datin Seri Dr Siti Hasmah Mohd Ali adalah antara 12,000 tetamu yang menghadiri jamuan perdana di Pusat Dagangan Antarabangsa Melaka (MITC), Ayer Keroh, malam tadi.

Jamuan anjuran kerajaan negeri diadakan sempena meraikan peserta Kejohanan Badminton Piala Perdana 2003 anjuran Bakti.

Turut hadir, Timbalan Perdana Menteri, Datuk Seri Abdullah Ahmad Badawi dan isteri, Datin Seri Endon Mahmood; Ketua Menteri Melaka, Datuk Seri Mohd Ali Rustam dan isteri, Datin Seri Asmah Abdul Rahman, menteri dan timbalan menteri kabinet, ketua menteri dan menteri besar.

Ketibaan Dr Mahathir di MITC diarak oleh 50 pengayuh beca dan diiringi kira-kira 2,000 pengiring yang berpakaian etnik masing-masing.

Pada majlis itu juga, Dr Mahathir dan isteri turut diraikan oleh kerajaan negeri serta orang kenamaan lain sempena ulang tahun perkahwinannya ke-47 yang disambut Rabu lalu.

Berucap pada majlis itu, Dr Mahathir berkata, usia perkahwinan hampir sama dengan usia kemerdekaan negara.

"Hampir 47 tahun saya terikat dan tidak boleh bebas seperti sebelum ini. Dalam tempoh itu, tidak terlintas di fikiran saya menggunakan sistem pesanan ringkas (SMS) terhadap isteri saya," katanya berseloroh sambil mendapat tepukan gemuruh tetamu.